

沈四山人詩錄



叢書集成

初編

主編者
王雲五

商務印書館發行

編主五雲王

編初成集書叢

錄詩人山四沈

中華民國二十六年六月初版

著者

沈謹學

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

(本書校對者曹鈞石)

本館據滂喜齋叢
書本排印初編各
叢書僅有此本

沈四山人詩錄序

道光乙未夏。蚤起。稚子應門。拾得片紙。字數行。甚草草。略說甫里田事。意若舉一隅以概其他。謂非余無可言者。然余置之數歲。了不在念。今歲丁未。招甫里沈四山人來宿蔓菴。乃知往歲片紙。卽山人筆也。余閉門後。獨喜與玉松老人筆譚。嘗使至。余方飯。客未卽復。駭而來問云。執事寡交。一飯未嘗留俗客。客何人。亟欲知其姓名。一識其面爲快。今玉松老人已去世矣。若知蔓菴有宿客當何如。驚重邪。山人自少力田。甫里人稱其孝弟。偶爲詩。自怡悅而已。不求人知。宿余齋三十餘日。未嘗一言及詩。一日忽作夢游山吟示余。余覽之惘惘然。固知山人不久留於世。次日病作返甫里。兩月餘而卒。遺詩一冊。江君補松取以見寄。名之曰沈四山人詩錄。沈四山人者。余所稱也。唐沈千運嘗曰。衡門之下。可以棲遲。有薄田園。男稼女織。偃仰今古。自足此生。當時士流敬慕。號爲沈四山人。今山人亦行四而志趣相類。宜以爲稱。因擬高適還山吟送沈四山人一篇詒之。又余初見山人時。贈以一律。有云。奈何一相對。猶失古之奇。古之奇亦唐人。昔人稱其詩足幽閒澹遠之思。余此二語若爲之識云。是爲序。同郡潘曾沂。

沈山人事略

山人姓沈氏諱謹學字詩華又字秋卿居甫里之西北二里其聚曰楓莊實郡之元和人。家世農業自其父明德以力耕致豐給始延里儒教二子長立學字醉餘次卽山人山人少警異讀書務得領要然不喜舉子章句之學獨爲歌詩以陶冶風物發抒襟抱蓋其天性能之故終其身雖窮不廢且益工也。初山人之孤也醉餘肩農業而委之於學故其詩長而益高及醉餘死而山人之爲生事拙值吳中水潦連歲不登山人督耕又怠旣困矣又得人瀕江棄田若干畝培上爲高謂水患可以人力勝凡耗數百金功卒不就農業反壞後數年乃率妻子爲人傭耕或以山人始疏嬾今自苦若此疑其中有不自得者而山人歌歎自如也。又數年人之傭山人者謂山人之報我不足且更其傭而奪之田於是山人益困飢寒且劇日嗷嗷焉以至於死蓋十年於今矣。山人性純孝奉母如素封家與醉餘尤友愛撫其孤如己子始困時視棄產如脫屣不負人一錢一粟或乘勢摧辱之亦不答其旣困而且窮也自揣無以報終不以絲毫干人其平居議論雖高亦不舉人短以立說及聞善人君子或鄉里節義之事則又嗷嗷歎息如不克道此在里人猶稱之以爲孝友敦厚至其胷中皎皎坦坦無一切尋常世俗之心出語吐棄凡近介介不可人意或獨居慨慕抗懷往古與其行踪落寞常自引於世故物情之外則皆非笑嗤薄之固自難得而知焉。方山人業在時亦致一二敦樸之士相與殺雞淪茗爲會論漢魏古詩以下纚纚洋洋窮日夜不倦然不能

以禮容應客。唯真率而已。嘗有二人具衣冠候之。至則家人驚異。欲不告以山人在所。適山人自至。跼蹐履不韞。方從容去。簞笠而揖。蓋自赤日中飯牛來也。凡山人前後相識數人。皆同郡之能詩者。其少時則有吳江徐達源。折節與之交。近數年。乃與郡城楊白。劉泳之善。至江滢則里居時相近。往來尤熟。故爲事略以乞文於君子。山人年四十有八。卒以道光二十七年四月二十日。子四人。由中。端中。思中。致中。致中尙幼。餘俱爲人傭耕云。同郡江滢。

丁未七月。余在閩中。得山人凶問。千里之外。不能悉其後事。獨念山人行誼始末。唯余知之最詳。不可無述。故爲事略。寄小浮先生。乞據爲傳。蓋先生知山人最深。文字固當有屬也。歸里後。知先生旣序其詩。文不重出。余始錄存是稿。今洪丈髯顛首刊其詩全集。其發潛闡幽之意。尤欲讀之者知其人也。故錄是稿歸之。而附著爲文之本意如此。道光庚戌二月二十一日。江滢自記。

沈四山人詩錄總目

序文

事略

第一卷

古今體詩六十二首

第二卷

古今體詩七十五首

第三卷

古今體詩五十四首

第四卷

古今體詩六十三首

第五卷

古今體詩六十首

第六卷 補遺

沈四山人詩錄 總目

沈四山人詩錄 總目

古今體詩十三首

跋

附錄

沈四山人詩錄卷一

清 元和沈謹學詩華箸

幽居吟 甲戌

幽居遠城市。野曠非山深。仄徑界桑麻。遠廬多綠陰。野花不知名。疏香長滿襟。野鳥不避人。時來送清音。眼前無機事。何處生機心。性情澹流水。風月閒黃金。野人耕釣餘。聊爲幽居吟。

早春

柳條弄色綠還未。老梅著花香不勝。吟邊探春得消息。今日硯池已脫冰。

春日卽事 乙亥

柴門靜掩水之涯。風颺茶煙縷縷斜。簾卷不禁寒氣重。滿階春雪落梨花。

谿上

春煙兩岸平。流水一竿冷。夕陽隔谿來。零亂桃花影。

咏柳

得春先得得愁先。倚著東風亦可憐。慣爲別離迷客思。更何聊賴管華年。白生幻影空飛絮。綠到無情欲化煙。一片夕陽數聲鳥。枝枝閒在酒旗邊。

嚴芝田兆鶴見招

雨歇疏疏兩三□。故人置酒隔谿招。故人家在綠楊裏。踏過邨東小板橋。

春暮

吹斷花魂一夜風。十枝竟有九枝空。兒童果否知憐惜。爭向階頭拾落紅。

夏夜卽事

竹牀竹簟夜涼生。明月一窗將二更。阿母喚兒莫眠著。教聽小妹背書聲。

秋月

團團出東海。皎皎入清秋。橫漢竟無影。疏簾不下鉤。白鋪霜在瓦。寒浸水盈樓。莫照離人眼。還能化淚流。

見秋柳有感

春恨不隨飛絮盡。離愁直比亂蟬多。晚來獨向江頭望。如此蕭條奈爾何。

秋感二首

融融一日春風至。千枝萬枝弄青翠。蕭蕭一夜秋風作。千枝萬枝盡黃落。中有蒼松竟何仗。秋風愈吹愈
峯強。旁人不識松堅貞。反道秋風亦世情。

蒼松不畏秋風吹。其他羣木洵可悲。木葉落盡巢鵲寒。兼之冷雨飛漫漫。鵲踏空枝無處著。聲聲似怨秋
風惡。有人見之笑且憐。問爾昔日何不巢松顛。

梅花 丙子

十丈竹籬橫一枝。不勝疏瘦強支持。孤邨料峭春寒重。野店微茫舊夢遲。香浸半谿水清淺。影迷午夜月參差。高情羞接閒桃李。早被風前玉笛知。

過七家橋

盈盈春水蕩輕橈。兩岸煙拖柳萬條。著箇鶉鳩唬不住。斜風細雨七家橋。

江邨雨後

江邨雨後淨娟娟。著屐閒行落照邊。芳草欲迷谿上路。垂楊低罩渡頭船。風吹牧笛來平坂。目極歸帆入暮煙。引起懷人情一片。早隨新月掛遙天。

春怨

一聲暖鳥晚晴開。寂寂中庭半綠苔。猶有東風餘力在。扶將花片入簾來。

一枕

不出柴扉十日將。春愁雙燕話空梁。年年三月病如此。一枕落花詩夢香。

春盡

睡思朦朧酒思遲。別無消遣只吟詩。中庭不種閒花草。去盡春光尙未知。

初夏邨居

補足綠陰飛盡絮。眼空爛漫一春花。矮茅屋小分谿住。橫板橋低趁岸斜。喧我幽居惟鳥雀。爭人行徑但桑麻。年來多少推遷感。獨立松風咏暮霞。

長相思

長相思。飛花脫盡楊柳枝。春光去去不可挽。予懷脈脈將何之。月明孤館低吟夜。雨滴空階獨坐時。君不來。長相思。

黃梅

小掩柴門谿岸邊。工夫偏穩病中眠。浮雲影送家家雨。放水聲來處處田。紅杏子肥消午渴。白銀魚嫩賣朝鮮。江邨清景憑傳出。又是黃梅五月天。

初夏偶成

輕暖輕寒近麥秋。忽晴忽雨亂嘯鳩。水田平野白飛鷺。楊柳依門青綰牛。春事一番隨斷夢。小詩幾首疊閒愁。出行不得無聊我。欲向鄰家借釣舟。

夏夜

浴罷清風來。幽懷一以放。流螢出竹閒。自墜青苔上。

白荷花

白荷花朶一齊開。冷壓方塘雪作堆。賺得襤褸江上鷺。誤驚是伴忽飛來。

靜坐

蟬聲一桁綠陰涼。橫向窗前翳夕陽。風定細分爐篆影。簾疏不隔藕花香。繙書聊當消閒計。靜坐還成養病方。便覺片塵無著處。泊然直與世情忘。

紀夢

一鐙如豆低結花。欲明不明疏窗紗。朦朧欹枕不自意。合眼分明見阿耶。阿耶憐兒太消瘦。摩兒頂又握兒手。道兒形軀本怯弱。那堪一病逡巡久。長跼問阿耶。耶何今日始還家。一向阿耶在何處。耶今還家莫更去。阿耶低白首。向兒重丁寧。兒病當自愈。慎勿輕餌參與苓。轉眼忽然耶不見。須臾境亦模糊變。痛哭呼耶耶不應。驚醒阿娘喚兒聲。

薄暮渡江作

臨風獨立船頭上。長嘯一聲天地寬。心事百年渺何許。半帆落日大江寒。

夜半

滿院蟲聲曬落葉。一篝鐙火淡秋煙。薄披衫子不勝冷。夜半月明人未眠。

楓橋就醫歸

月向篷窗時掩映。舟人無語鴈聲微。誰憐夜半秋江上。一葉扁舟載病歸。

重陽

野人何處著秋光。十丈疏籬帶草堂。昨夜西風開到菊。忽驚時節又重陽。

月夜谿上作

隔谿老樹株。僵立橋邊路。月來影似人。橫斜欲爭渡。寒吠聲忽停。犬意亦知誤。

吳淞江歸櫂

淞波一片冷秋光。帆影低斜掛夕陽。遙指水雲邨缺裏。接天紅葉是楓莊。

秋夜

一欄清影露華涼。徙倚偏驚此夜長。月上疏梧尋宿鳥。風扶落葉走虛廊。離情處處添蕭寂。秋夢家家入渺茫。自覺幽懷無可遣。低吟詩句和嘯蜚。

蘆花

月搖江水翰無影。風掠沙灘聽有聲。划隻釣船相傍宿。鷺鷥披上一身輕。

子夜歌 丁丑

帶圍寬欲盡。纔道相思惡。情絲如蠶絲。自抽還自縛。是儂平日願。所願郎情多。見面果如此。背後當如何。

長日

長日懨懨如小年。使人困頓使人憐。幾枝煙柳綠成夢。一樹火榴紅欲然。水迹未乾過雨地。茶聲疑殺作

風天阿儂多少閒心事付與南窗一枕眠。

江邨晚興

忽忽江邨暮夕陽紅半天。人家臨水岸。茅屋起炊煙。霞斷遙山外。風生細柳邊。葛衣涼可掬。獨立聽鳴蟬。
江上殘陽盡。天邊早月生。鐘聲僧寺遠。帆影客舟輕。林鳥亂投宿。野人齊罷耕。讀書鐙已點。籬落漏微明。

采菱歌二首

清寒料峭逼清波。衫子不勝薄薄羅。一點深情惆悵在。低聲唱出采菱歌。
有菱何須論肥瘦。有水何須論淺深。不愁菱角刺儂手。只愁菱角刺儂心。

寫懷

何須瑣瑣受人憐。何必茫茫更問天。萬樹梅花一閒屋。縱然矮殺可高眠。
不寐

孤懷冷落亂愁堆。如豆鐙花寂寞開。舊夢幾番尋不得。蟲聲寒到枕邊來。

靜中

點點寒苔作意青。鳥隨落葉下空庭。一彎竹徑無人到。兩扇柴門盡日扃。草折疏煙跳蚱蜢。檐兜殘照掛蜻蛉。靜中別有幽居樂。說與時人恐不經。

邨鄰失稻歌以紀事

一家五口田八畝。竭力耕田債還負。那有餘錢更買牛。兩腳踏車當牛走。人腳不如牛腳強。腳底血出筋骨僵。不惜血出筋骨僵。但願苗比人身長。稻苗日長人日槁。秋風瑟瑟吹行道。比鄰老翁走相慶。今年稻比去年好。雄雞膺膊天朦朧。傾家穫稻趨田中。張眼各各面如紙。上塍下塍一望空。一望空無餘穀。淚雨紛紛眼中落。一年辛苦飽他腹。贏得歸家放聲哭。放聲哭兮門不開。又聞門外催租來。

路旁草

誰謂路旁草。不如枝上花。枝上一朝春力盡。風飄雨泊隨泥沙。

暮秋

柴門徙倚望斜照。在衣襟。疲病黃牛骨。離愁紫燕心。西風吹木落。一夜感秋深。邨巷有寒意。家家急暮砧。

秋晚卽事

鱗鱗白雲靜。瑟瑟西風涼。早稻已成熟。晚稻亦微黃。鄰家作晚炊。散出新米香。

初冬

病骨瘦如此。幽懷書半牀。平林有黃葉。昨夜得新霜。犬夢晨扉靜。雞聲午飯香。無多了清課。臨帖兩三行。

春雪 戊寅

香滿新茅屋。梅花儘力開。亂雲乘暮起。飛雪拗春來。白補三冬絮。青藏一院苔。天涯有游子。躡屐幾徘徊。

早春遣懷